

BATASUNA. Ilegalizazioaren aurka azalduriko taldeei ekimen politikoa bultzatzeko eskatu die Barrenak

Astebetez erakunde guztietan planto egingen dute Batasuneko hautetsiek

Espainiako Senatuak etzi onartuko duen Alderdien Lege aldaketa salatuko dute egunotan

Irene Arrizurieta | IRUÑEA

Bihartik aurrera, astebetez, ordezkariak duten erakunde guztietan planto egingen dute Batasuneko hautetsiek. Ekimenarekin, Espainiako Senatuak etzi onartuko duen Alderdien Lege aldaketa salatuko dute, «modu aktiboan».

«Ilegalizazioaren mehatxua egonik, hautetsiek ekimena hartzea erabaki dugu», azaldu zuen atzo Fernando Barrena Batasuneko Nafarroako legebiltzarkideak, Iruñean komunikabideen aurrean egindako agerraldian. Heldu den astean Batasunak ez du ohiko jardura politikorik egingen ordezkariak duten udaletan; Arabako, Bizkaiko eta Gipuzkoako batzar nagusietan; eta Gasteiz eta Nafarroako legebiltzarretan. Dena dela, taldeko ordezkariak egingen duten plantoa zertan oinarrituko duten ez zuen zehaztu Barrenak.

Aurreratu zuen «aktibo» izan dela, eta Batasunak gehiengo duen udaletan lan administratiboa bakarrik egingen dela heldu den egunetan.

Ordezkaritza duten gainerako erakundeetan hartuko duten jarrera bihar erabakiko eta jakinaraziko dute tokian tokiko hautetsiek.

Hala hitzartu zuten herrialdeetako Batasuneko hautetsiek atzo, Iruñeko nazio egoitzan egin zuten bileran. Hitzorduan bukatzean den ikasturte politikoaz gogoeta eta bilduma lana egin zuten. Gisa berean, heldu den ikasturterako lan oinarriak zehaztu zituzten.

Batasuneko hautetsiak kezkatuta daude ilegalizazioaren «mehatxu larriarekin», aurreantzean euren lana «baldintzatu» dezakeelako. «Gure hautetsiak kezkatuta daude, legeak erakundeetan egiten dugun lanean izan dezakeen eraginagatik», azpimarratu zuen Barrenak.

Batasunaren irudiko, PPko gobernuak PSOE eta beste talde batzuen laguntzarekin onartu duen Alderdien Lege aldaketa «aski larria da, euskal gizartearen gehiengoak aurka dagoela esan baitu». Horren adierazle joan den ekainaren 15ean Bilbon haren aurkako manifesta-

LANDER F. ARROIABE / ARGAZKI PRESS



PERNANDO BARRENA

Batasuneko mahaikidea

«Kezkatuta gaude, erakundeetan egiten dugun lanean legeak izan dezakeen eraginagatik»

zioan bildu zen jendetza dela nabarmendu zuen Barrenak. «Ilegalizazioak ez dio deus onik ekarriko egungo egoera politikoari. Legez kanpo utzi nahi du

euskal gizartearen %20, eta egoera are gehiago korapilatu daiteke», esan zuen Barrenak.

Nafarroako legebiltzarkideak Batasunak ordezkariak duten erakundeetan lanean jarraituko duela berretsi zuen. «Uste dugu gure lana garrantzitsua eta ezinbestekoa dela, eta bakea eta autodeterminazioa aldarrikatzen jarraituko dugu», gaineratu zuen mahaikideak. «Gure zilegitasuna ez dator Madrilik, guregan konfiantza jarri duten milaka herritarrengandik baidzik», jakinarazi zuen.

Deia EA, EAJ eta EBri

Batasuna lege kanporatzeak ekar ditzakeen «ondorio larriak» saihesteko, Barrenak dei egin zien jendaurrean legea kritikatu duten EA, EAJ eta IU-EB alderdiei.

Behin Senatuak legea onartuta, ekainaren 26an araudiaren aurkako «ekimen politikoa har ditzaten» eskatu zien Barrena alderdi horiei. Gonbita, talde horiei ez ezik, legea «bake prozesua zapuzteko saioa» dela pentsatzen dutenei ere egin zien Batasuneko mahaikideak.

EAJ

Iturgaitzen aurka salaketa jarriko du EAJk, «Euskadi tiroka» eraikitzen duela esateagatik

Efe | MADRIL

Carlos Iturgaitzen aurka epaitegian salaketa jarriko du EAJk, atzo EBBk iragarri zuenez, jeltzaleek «Euskadi tiroka» eraikitzen dutela esan zuelako EAEko PPko buruzagiak. EAJren aburuz, adierazpen horiek delitu dira, eta ohartarazi zuen Zigor Kodeak kalumniantzat jotzen dituela «gezurrezkoa dela jakinik, edo egiari mespretxu eginez, norbait leporatzen zaizkion delituak».

EAJri horrelako zerbait leporatzea, «107 urtean era baketsu eta demokratikoan gizabanakoen eskubide eta askatasunak defendatu dituen alderdi bati hilketa delitu bat egoztearen parekoa» dela dio EBBk. «Ez da ahaztu behar Francoren diktadura Alderdi Popularraren aurrekari politikoa dela, eta, bistan denez, etorkizuna ere bai», erantsi zuen EBBk.

Iturgaitzen hitzak «burugabekeria» direla dio EAJk: «Gaur egun Kongresuan onartzean dagoen Alderdi Politikoen Legean alderdi bat lege kanpo uzteko arrazoietako batean txertatzen dira».

PPren erantzuna

EAEko PPko idazkari nagusi Carmelo Barriok atzo esan zuenez, alderdiko zuzendaritza bat dator Iturgaitzek egindako adierazpenekin. Horrez gain, EAJ «PPri dion gorrotoaren arabera» mugitzen dela adierazi zuen. Barrioren aburuz, EAJk Iturgaitzen aurka jarriko duen salaketa «kasketa moduko zerbait da», eta, horrekin, EAJk «Batasunaren xede abertzaleekin eta bereizketa eta haustura bultzatzeko proposamenekin bat datorrela estali nahi du».

Barrioren ustez, salaketak erakusten du EAJk ez duela «gogoeta eta barne kritika egiteko gaitasunik. Soilik bulkadaka mugitzen da».

Alderdien Legearen aurkako manifestazioan Xabier Arzalluz eta Arnaldo Otegi joateak «EAJk ETAren eta Batasunaren estrategia onartzen duela esan nahi du», atzo Barriok salatu zuenez.

PP eta PSE-EE Araban egiten ari diren politika salatu dute ehunka lagunek Gasteizen

Edurne Begiristain | GASTEIZ

Beste Araba bat posible da lelopean, ehunka lagun kalera atera ziren atzo Gasteizen, PP eta PSE-EE Araban egiten ari diren politika salatzeko. Batasunak deitutako manifestazioa arratsaldeko zazpitan irten zen Bilbo plazatik, hiriko kale nagusiak zeharkatu zituen, eta Andra Mari Zuriaren plazan bukatu.

Pankartaren atzealdean Batasuneko hainbat ordezkari joan ziren manifestazioaren buruan: besteak beste, Rakel Peña, Antton Morcillo, Koldo Gorostiaga eta Iñaki Usategi. Manifestazioaren bukaeran, Hasier Arraiz Arabako Batasuneko bozeramaileak adierazi zuen PPK eta PSE-EEk «zokoratzen eta ezkututzen duten beste Araba hori posible» dela. Elkar-



RAUL BOGAJO / ARGAZKI PRESS

Batasunak deituta, Araba osoko manifestazioa egin zuten atzo Gasteizen.

tasunean eta justizia sozialean oinarritutako Arabaren alde lan egin behar dela azaldu zuen Arraizek. «Francoren jarraitzaileek Araba 30 urte atzera eraman nahi dute, baina ez diegu utziko», ohartarazi zuen.

Bestalde, goizean egindako jardunaldien balorazioa egin zuen Batasuneko ordezkariak. *Araba txuria, gorria eta berdea* izenburupean egindako ekitaldia onuragarria izan zela esan zuen, «oztopo guztien gainetik

Arabaren alde lan egiten jarraitzeko beharra ikusi delako». PP eta PSE-EEren «faxismoari» aurre egiteko ezker abertzaleak «indarrak batu» behar dituela adierazi zuen, «beste Araba bat egitea posible delako».